



## HASATIL

(HAMETIN AGRICULTURA SUSTENTAVÉL TIMOR LOROSA'E)  
Rua. St. Antonio Motael – Farol, Dili  
Tel. (+670) 77287429 E-mail: hasatil@sapo.tl

---

### KOMUNIKADU IMPRENSA BA LORON MUNDIAL AI-HAN 16 Outubru 2020

Iha loron Sanulu Resin Neen (16) Outubru, mundu tomak sei selebra loron mundiál ai-han, inklui governu no ajénsia dezenvolvimentu sira iha Timor-Leste. Iha loron hanesan mós movimentu kamponeza, toos no natar na'in sira, iha mundu tomak selebra **Loron Internasionál Asaun ba Soberania Ai-han no Kontra Kompañia Transnasionál** sira.

Tema nasionál Timor-Leste nian ba tinan ida ne'e mak: **Kuda, hakiak no haburas ai-han nutritivu hodi sustenta jersaun futuru ne'ebé saudavel**. Tema ne'e hatudu katak governu Timor-Leste rekoñese duni katak tenke iha planu no programa integradu no realistíku atu halo produsaun rasik. Liu husi dalan ida ne'e mak bele promove agrikultura ne'ebé sustentável no benefisia povu Timor-Leste tomak, jersaun agora no futuru.

Rede HASATIL ne'ebé hamahan organizasaun sira ne'ebé servisu ba promove agrikultura sustentável iha Timor-Leste, hakarak fó hanoin fali ba públiku, liu-liu ba governu, doador, ajénsia internasionál sira, atu fó atensaun ba pontu balu hanesan tuir mai ne'e:

- Atu **Kuda/prodús, hakiak no haburas ai-han nutritivu hodi sustenta jersaun futuru ne'ebé saudavel**, Timor-Leste prezisa tau matan sériu ba ambiente, ai-laran ho natureza tomak inklui liu husi konserva bee matan natural sira. Se laiha re-florestasaun no Konservasaun bee ida ne'ebé di'ak, Timor-Leste sei hetan ameasa falta bee ba atividade produsaun ai-han no ba konsumu uma laran nian.
- Ajénsia internasionál sira oras ne'e implementa programa agrikultura barak ne'ebé sentraliza ba produsaun hortikultura hodi responde ba demanda merkadu iha Dili. HASATIL preokupa katak ita boot sira kontinua promove fini ortikultura fbrida sira ne'ebé agrikultór sira labele habarak rasik no hasa'e dependénsia ba kompañia sira.
- Timor-Leste oras ne'e iha número malnutrisaun ne'ebé as, li-liu ba labarik sira ho idade tinan 5 mai kraik ne'ebé too 46% sei sofre **Ra'es badak, ka isin la buras tuir ninia idade**. Situsaun ne'e nudár problema nasionál ne'ebé governu no entidades tomak, inklui comunidade tenke tau matan ho sériu tanba labarik sira ne'e mak Timor-Leste nia jersaun futuru. Se sira nia moris la saudavel no laiha saúde di'ak agora, oinsá sira bele tane rai ida ne'e iha futuru?
- HASATIL husu ba Governu no parte interesadu hotu, atu investe liu tan iha kampaña nasional hodi enkoraja família sira atu kuda no konsumu ai-han lokál ne'ebé iha

nutrisaun di'ak ba membru família sira. Ami mós husu atu parte hotu servisu hamutuk hodi habelar nafatin koñesimentu kona ba valór nutrisaun husi ita nia ai-han lokál sira.

- Iha fulan oin governu sei implementa programa **Cesta bázika** hodi fahe ai-han ba populasaun sira. Ami haree katak programa ne'e di'ak ba tempu badak tanba bele ajuda família sira ne'ebé kuran/menus ai-han. Maibé ba tempu naruk, governu tenke fó prioridade liu atu investe ba hakbiit ekonomia família nian, nune'e família sira rasik iha kbiit atu asesu ba ai-han nutritivu sira tuir sira nia preferénsia.
- HASATIL mós hakarak fó hanoin katak governu nia planu atu sosa produktu lokál mosu iha tempu ne'ebé maioria agrikultór foin prepara atu kuda/prodús (époka primeiru). Iha possibilidade boot produktu rai laran sei menus. Ami observa katak, governu sei gasta osan **Cesta bázika** nian barak liu ba sosa produktu importadu sira. Tanba nee, ami sujere atu hanaruk periodu Cesta báziku nian ba to fulan neen (6) ka to tinan 1, hodi fó tempu ba agrikultór sira ne'ebé oras ne'e foin tama ba époka kuda batar, hare, koto no produktu lokál sira seluk atu sira mós hetan benefísiu husi programa sosa produktu lokál nee.
- Agora daudaun governu ho ajénsia internasionál sira promove hela programa fortifikasaun foos ne'ebé ho nia objetivu atu hasa'e nutrisaun iha foos sira. HASATIL hanoin katak programa ne'e sei kontinua hasa'e de'it Timor-Leste nia dependénsia ba foos, tanba hakarak promove foos nudár ai-han ho nutrisaun di'ak. Ami enkoraja atu governu no ajénsia sira sériu no foka servisu ba hasa'e produsaun ai-han oin-oin (diversifikadu) iha rai laran ne'ebé iha nutrisaun di'ak liu duke foos.
- Timor-Leste iha rai agrikultura ne'ebé limitadu. Tinan-tinan ita nia area produsaun tuun ba beibeik. Se ita la prevene agora, produsaun ai-han iha rai laran sei tun ba beibeik, tanba rai mak baze ba produsaun ai-han. Tanba ne'e ami husu atu governu hapara foti rai produtivu ba atividade infraestrutura fíziku nian hanesan estrada, aeroportu no planta ba indústria mina nian.
- Ministériu agrikultura mak iha papél importante liu ba produsaun ai-han iha rai laran. Maibé Ministériu ida ne'e tinan-tinan hetan dezafiu barak tanba orsamentu ne'ebé limitadu no mós falta de prioridade husi governu. Ami rekomenda ba governu atu investe maka'as liu ba iha servisu agrikultura iha munisipiu sira inklui haforsa no kapasita extensionista sira hanesan 'frontliner' iha setór agrikultura. Governu presiza kria kondisaun ho fasilidade ne'ebé adekua ba extensionista atu bele halo sira nia servisu ho efektivu iha area rural sira hodi apoiu duni agrikultór sira.

Dili 16 Outubru 2020

Ekipa Advokasia HASATIL

- La'ó Hamutuk
- Asosiasaun HAK
- Permatil
- KSI
- ETADEP

Kontaktu: Koordinadór Sek. HASATIL, Gil Boavida, 77287429 ou Mariano 77237176